



# ZORNADE INTERNAZIONÂL DE LENGHE MARI

*Ai 21 di Fevrâr une ocasion spacial par celebrâ il dirit di fevelâ la propre lenghe*

Lis lenghis, cun dut ce che a representin pe identitât, la comunicazion, la integratzion sociâl, la istruzion e il svilup, a son di impuatance strategjiche pes personis e pes lôr relazions, in cualsisi part dal mont.

Tal ricuardâ il valôr di dutis lis lenghis, soreduto di chêz che a son ae fonde des nestris lidris, nus jude anche la **Zornade Internazionâl de Lenghe Mari** che e je stade istituide intal Novembar dal 1999 de Conference Gjenerâl de Organizazion des Nazions Unidis pe educazion, la sience e la culture (UNESCO), par promovi la diversitat linguistiche e culturâl e il multilinguisim. E ven celebraide in dut il mont a ricuart di un episodi dramatic sucedût ai **21 di Fevrâr** dal 1952, cuant che cuatri students bengalês de Universitat di Dacca (e altris si zontarin intai dîs seguitifs), a son stâts copâts par man de polizie di chel che alore al jere il Pakistan orientâl, intant che a rivendicavin la ufficialitât de lôr lenghe, il bengali.

Magari cussi no, chest fat si ripet, in formis differentis, di continui in dut il mont e dilunc dute la storie, no dome in Asie, ma anche in chei altris continents, e soreduto tai confronts des lenghis indigjenis, chêz dai abitants antics. Chest al sucêt soreduto par vie des lenghis plui "fuartis" e dominantis dal pont di viste economic, militâr o statâl che a rinfuarçin la lôr discriminant lis lenghis mari locâls. Il risultât di chest al è la sparizion e la muart des lenghis e cussi tancj popui a pierdin la lôr richece inteleutâl – cemût che a disin anche in dì di vuê une vore di linguiscj e di organizazions tant che la ONU e la UNESCO. Chestis a son pierditis pal patrimoni de umanitât.

La ARLeF - Agjenzie Regionâl pe Lenghe Furlane e je impegnade, de sô istituzion, te valorizazion e te promozion dal ûs de lenghe furlane in ducj i ambiti de vite cuotidiane: pubbliche aminstrazion, istruzion, mieçs di comunicazion e societât in gjenerâl, parcè che ogni dì e je la zornade de lenghe mari.

Chest an, par dâi lusôr ae Zornade internazionâl, la ARLeF in cunvigne cul Consei regionâl dal Friûl-Vignesie Julie e presentarà, dentri de fin di Fevrâr, la traduzion par furlan, sloven e todesc des "Dieci Tesi per l'educazione linguistica democratica" dal linguist Tullio De Mauro. La iniziative de traduzion e je stade coordenade de professore Silvana Schiavi Fachin.

Il stes De Mauro al scriveve che: "La lenghe mari che cun cheste o sin nassûts e o vin scomençât a orientâsi tal mont, no je une manece, un strument di doprâ e po butâ vie. La lenghe e da gnerf ae nestre vite psicologjiche, ai nestris riuarts, associazions, schemis mentâi".

I locutôrs des 6.700 lenghis che a esistin intal mont a ân duncje il dirit di fevelâlis, di doprâlis e di valorizâlis e i locutôrs dal furlan no ân di jessi di mancùl in chest!

**Buine Zornade internazionâl de lenghe mari!**

